

Naalackersuisut kingusinnerpaamik UPA2020-mi Kalaallit Peqqissartut Angerlarsimaffianni kalaaliminernik atuinerup qanoq iliorluni annertusineqarsinnaanera pillugu misissuineramik suliaqarnissaat pillugu Inatsisartuni aalajangiiffigisassatut siunnersuut. Misissuinermi - ajornanngippat - igaffissuarmi igaat kalaaliminersunninnerat qanoq ililluni annertunerulersinnaanera pillugu kaammattuuteqarfigineqassaaq.

(Inatsisartunut ilaasortaq Stine Egede, Inuit Ataqatigiit)

Akissuteqaat

(Peqqissutsimut, Isumaginninnermut Inatsisinullu Atuutsitsinnermut Naalackersuisoq)

Siullermeerneqarnera

Inuit Ataqatigiit sinnerlugit Inatsisartunut ilaasortap Stine Egedep Kalaallit Peqqissartut Illuanni kalaaliminernik atuinerup qanoq iliorluni annertusineqarsinnaanera pillugu misissuineramik suliaqarnissaat kiisalu igaat kalaaliminersunninnerat qanoq ililluni annertunerulersinnaanerannut aalajangiiffigisassatut siunnersuummik tunniussisimaneranut Naalackersuisut qujapput.

Kalaallit Peqqissartut Illuanni pissutsit sivitsortumi assut ukkatarineqarput. Tassani nerisassat kalaaliminernillu atuneq pingaartumik qitiutinneqarput. Peqqissartut illuata najugaqartut sapinngisamik sinaakkutit iluanni pitsaanerpaamik atugassaqartinneqarnissaat sulissutigigaa Naalackersuisut qularinngilaat.

Nerisassanut tunngatillugu peqqissartut illuanni igaffimmi ilinniarsimasumik sulisoqarpoq. Sulisut assigiinngisitaartumik naleqqussakkanillu kalaaliminernik qallunaaminernillu nerisassiorput, tassani najugaqartut assigiinngitsunik pisariaqartitsinerat eqqarsaatigineqartarportaaq. Pingaaruteqarpoq eqqaamassallugu innuttaasut sinerissameersut, assigiinngitsunik ukiullit assigiinngitsunillu nappaatillit peqqissartut illuanni najugaqartarmata. Assersuutigalugu Kræftens Bekæmpelsemiit innuttaasut kræftimut katsorsarnerqarnermini nerisarisartagassaat pillugit innersuussutit malinneqarput. Taassuma saniatigut katsorsartinnerup nalaani nerinissamik pisariaqartitsineq allanngorsinnaammat najugaqartut ilaat nerisat pillugit oqaloqatigineqartarput.

Najugaqartut nerisassanut kissaataat akueriniarlugit igaffimmi sulisut kalaaliminernik sanasoqassatillugu najugaqartut isumasiortarpaat. Najugaqartut ataasiakkaat sumingaanneersimanerat apeqqutaalluni kalaalimerngit akussaannut aamma iganissaannut kissaataat assigiinngissinnaasarpud. Tamanna ilutigalugu mamassuseq najugaqartut sungiusimasaannit allaanerussaavoq. Taamatuttaaq katsorsartinnerit ingerlaneranni imaluunniit iisartakkat pissutigalugit sunniutit nerisassat susunninnerannik allanngortitsisinnaappud, taamaasilluni mamassusaanut inummut ataasiakkaamut sunniulluni.

Peqqissartut illuanni kalaaliminernik pissarsiniarneq Danmarkimi inuussutissanut oqartusaasut piunasaqaataat tunngavigalugit aamma pisiortortarfiup allanngornera pissutigalugit piffissap ilaani unamminarnikuvoq. Neriutugineqarpoq peqqissartut illuata pisiortortarfiullu

nutaap akornanni suleqatigiinnerisigut kalaaliminernik tunniussisarneq patajaanneru-
lerumaartoq.

Napparsimasut peqqissartut illuanni misigisaat pillugit ukkataqartussamik suleqatigiissitanik
Naalackersuisut Peqqinnissaqarfik pilersitsinissaanut qinnuigereerpaat. Suleqatigiissitat
assigiinngitsunik misissuissapput. Suleqatigiissitanit ukkatarineqartussat ilagaat nerisassat,
nerisassammi ataatsimut isigalugu uninnganermi misigisanut annertuumik
sunniuteqartarmata.

Taamaattumik Naalackersuisut nalilerpaat suleqatigiissitaq kalaaliminernik atuineq qanoq
annertusineqarsinnaanersoq kiisalu igaat kalaalimernisunninnerat qanoq ililluni annertuneru-
lersinnaanerannut aamma suliarisinnaagaat.

Naalackersuisut taamatut oqaaseqarlutik imaattumik allannguutissatut siunnersuusiorput:

*”Naalackersuisut kingusinnerpaamik Inatsisartut upernaakkut ataatsimiinneranni 2020-mi
Kalaallit Peqqissartut Angerlarsimaffianni kalaaliminernik atuinerup qanoq iliorluni
annertusineqarsinnaanera najugaqartunullu igaat kalaalimernisunninnerat qanoq ililluni
annertunerulersinnaanera pillugu misissoreersimassagaat”*